

Namminersorlutik Oqartussat siunnersuummut tulliuuttumut peqataalernissaannut akuersissuteqarnissamut Inatsisartut aalajangiussassaasat: Aningaasaatit pigisallu aningaasanik nalillit pillugit isumaqatigiissutit inuinnaallu akornanni pisassaqaataalersunik neriorsoqatiginninnerit allat pillugit inatsisit allanngornerannut peqqussummut Kalaallit Nunaata peqataalernissaa.

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneranut oqaaseqaat:

Naleraq sinnerlugu aalajangiiffissatut siunnersuut pillugu oqaaseqassaanga, uunga tunngasoq, aningaasaatit pigisallu aningaasanik nalillit pillugit isumaqatigiissutit innuttaasullu akornanni pisassaqaataalersunik neriorsoqatigiinnerit allat pillugit inatsisit allanngornerannut Kunngip peqqussutaanut Kalaallit Nunaata peqataalernissaa pillugu siunnersuut.

Siullermik oqaatigissavarput Naleqqamiit tunngaviatigut siunnersuut manna pitsaasutut isigigatsigu.

Sooq pitsaasuaa?

Pissutigalugu isumaqatigiissuteqartarneq inuinnaat ulluinnarni inuuneranni aammalu inuussutissarsiornermik ingerlatsinermi pingaaruteqarluinnarmat. Inuit pisiniaraangata, sullissinermut isumaqatigiissusiortaraangata, pisinnaatitsissutinik tunniussigaangata, imaluunniit suliffeqarfiit atugassarititaasunik aalajangersimasunik atuisillugit sullissigaangata, taava pingaaruteqartorujussuuvoq inatsisikkut tunngaviit nutaat, ersarissut aammalu innuttaasut illersorlugit aqqissuunneqarsimanissaat.

Maanna inatsisit atuuttut pisoqaalipput.

Allakkani erserpoq Kalaallit Nunaanni malittarisassat 1965-imi atuutilersinneqarsimasut, kingornalu kingullermik 1980-imi allanngortinneqarsimasut. Taamaattumik paasinarpog ullutsinnut naleqqussaanissaq pisariaqartoq. Nunarput, niuernermit atugassarititaasut, kiisalu atuisartut pisinnaatitaaffii ukiut ingerlaneranni allanngorujussuarsimapput. Taamaattumik inatsisit taama pingaaruteqartigisut pisoqqanik tunngaveqarnissaat naleqqussangilaq.

Siunnersuutip pingaarnarpaartaat ilagaat atuisut pitsaanerusumik illersorneqarnissaat.

Naleqqamiit tamanna pitsaasorujussuusoq isumaqarpugut. Ullumikkut innuttaasut amerlanerpaat isumaqatigiissutini peqataagaangamik namminneq atugassarititaasunik ilusilersuinngillat. Taarsiullugu suliffeqarfiit imaluunniit inuussutissarsiortut atugassarititaasunik piareersaareersimasunik saqqummiussisarput. Taamaattumik inatsisip qulakkiissavaa atugassarititaasut naapertuutinnigippata imaluunniit erseqqissaanngippata, atuisoq sanngiinnerusoq illersorneqassasoq.

Taanna pingaaruteqarpoq, tassami inatsisit inuinnarnut atuuttut innuttaasut paasiuminartittariaqarpaat.

Isumaqatigiissutit allakkat ersarissumik paasiuminartumillu suliarineqartarnissaat siunnersuummi ilaatinneqarpoq. Tamanna Naleqqamiit tapersorsorparput. Inuk isumaqatigiissummut atsiogataasoq ilisimasussaavaa suna akuersissutiginerlugu, suna pisinnaatitaaffiunersoq, suna pisussaaffiunersoq. Inatsisit aamma niuerneq innuttaasunut paasinartuusariaqarput.

Siunnersuutip ilagaa nammineersinnaassusiiagaasimasut inatsisitigut inissisimanerisa ersarissarneqarnissaat (umyndiggjort).

Tamanna aamma pingaaruteqartuuvoq. Inuit sanngiinnerusut inatsisitigut pitsaanerusumik illersorneqarnissaat inuiaqatigiinnut pitsaasuvoq. Siunnersuummi oqaatigineqarpoq pisinnaatitsissummik tunniussisoq nammineersinnaassusiiagaasimappat, taava isumaqatigiissusioqatigineqartoq pitsaanerusumik inissisimalissanngitsoq nammineq pineqartoq isumaqatigiissusioqatigineqarsimagaluarpat qanoq inissisimassagaluarneranut sanilliullugu. Tamanna isumaqarpoq sanngiinnerusup illersorneqarnera sukumiinerulersinneqartoq.

Aamma tamanna pitsaasuvoq, nammineersinnaassusiiagaasimasoq annaasaqarnissamut illersorniarlugu sullissisoq aalajangersimasunik pisariaqartunik inatsisitigut iliuseqarsinnaalersinneqarmat, pissutsit piaartumik iliuseqarfigineqartariaqaraangata. Taamaattumik siunnersuut tassaavoq inatsisilerinikkut teknikkuinnaanngitsoq, kisianni aamma inuup illersorneqarnissaanut tungasoq.

Naleqqamiit immikkut maluginiarparput siunnersuut Kalaallit Nunaanni pissutsinut naleqqussarneqarsimasoq.

Tamanna pitsaasuvoq. Danmarkimi inatsisit assilillugit eqqunneqarnissaat naammanngilaq. Kalaallit Nunaanni atuuttussaq Kalaallit Nunaanni pissutsinut, ingerlatsinermut aammalu

inatsisitigut aqqissuussaannermut naleqqussagaasariaqarpoq. Taamaattumik pitsaasuvoq siunnersuummi ilaatinneqarmat ilaatigut nalunaaruteqartarnerni aviisit imaluunniit allatigut naqitanik tusagassiuutit atorneqarsinnaanerit, aammalu Atuisartoqarnermut Unammilleqatigiinnermullu Aqutsisoqarfik atuuttumik inissinneqarmat.

Taamaamat uani pingaartuuvoq oqaatigissallugu:

Naleraq siunnersuummik tapersiinermini namminersorlutik inuussutissarsiortut akerlilersorniarnagit taamatut isummersortoq. Paarlattuanik isumaqarpugut niuerneq pitsaasoq, unammilleqatigiinneq peqqissoq aammalu innuttaasut tatiginninnerat aatsaat nukittorsarneqarsinnaasut inatsisit ersarippata naleqquppatalu. Aamma suliffeqarfiit pitsaasumik ingerlatsisut iluaqutigissavaat, malittarisassat ersarissuunerat eqqunngitsumillu atugassaqartitsisoqartillugu iliuuseqartoqarsinnaanera.

Aammattaaq pingaaruteqartutut oqaatigissavarput allakkani ersermat peqqussut pisortanut aningaasatigut imaluunniit allaffissornikkut annertuunik kinguneqassanngitsoq, innuttaasunullu pitsaanagerusumik illersuissasoq. Taamaattumik siunnersuut tassaavoq innuttaasut pisinnaatitaaffiit nukittorsaataasoq, annertuumillu pisortanut artukkiinngitsoq.

Kisianni Naleqqamiit pingaarutilimmik maluginiagaqarpugut.

Allakkani immikkut oqaatigineqarpoq pigisanut pisinnaatitaaffik aammalu isumaqatigiissusiornermi inatsisit suli qallunaat suliassaqarfigaat. Tamanna eqqumaffigisariaqarparput. Inuit Kalaallit Nunaanni najugaqartut ulluinnarni inatsisitigut illersorneqarnissaat pillugu malittarisassat nutarterneqartillugit ukiut amerlasuut utaqqisariaqarneq pitsaasuunngilaq. Taamaattumik siunnersuut manna pitsaasuugaluartoq, aamma takutippaa suliassaqarfiit innuttaasunut toqqaannartumik pingaaruteqartut pillugit nunatsinni nammineq sukkanerusumik aqutsisinnaalernissaq qanoq pingaaruteqartiginersoq. Taamaamat siornaakkunni akisussaaffiup tingunissaanut Naalackersuisut nalunaarusiornissaannik siunnersuuteqarsimavunga, taannalu ukioq manna tinguarput, qilanaarpugullu siunissami aamma inatsisit Danmarkip akisussaaffigisani nalimmassarlugit naammassinissaat aammalu akisussaaffimmik tingusinissatsinnut piareernissaat.

Naggataatigut oqaatigissavarput Naleqqamiit siunnersuut manna ilaleratsigu.

Isumaqatigiissutit pillugit malittarisassat ullutsinnut naleqqussarneqarnissaat pisariaqartuuvoq. Atuisut pitsaanagerusumik illersorneqarnissaat pisariaqartuuvoq.



nammineersinnaassusiiagaasimasut inatsisitigut inissisimanagerisa ersarissarneqarnissaat pingaaruteqarpoq.

Inuussutissarsiortut aamma ersarissunik naleqqussakkanillu malittarisassaqaarnissaat pingaaruteqarpoq.

Taamaattumik Naleraq siunnersuut manna pitsaasumik isigaa, Inatsisinullu ataatsimiititaliamut suliassanngorlugu ingerlaqqinnissaa innersuullugu.

Qujanaq.